

## यूहन्नाए

### उस०कताव ओसरो चिथी

आव चिथी येसुए उसिस यूहन्नाए यार्युं हुबोरालाई धुतनी पैज्यावराए ल्योनी जोगोइन्याए जूनी ओसरो ज़। नो धुतनी पैज्यावराए येसु परमेस्वरए साचो ओज़ा माःक, मिं मिन्सिद उहु ब माःक है यालिज़्याव। अजम्बरी जुनी दैन्या ते युं हुपून्यानी माःक, मिंए बुद्धीनी वाज़ दैसिज़्या है ब यालिज़्याव। है जैद मिंराए यार्युंनी जो हुज़्या हो ज़ दादी ब ताए है यालिज़्याव। निताव पाँरालाई उल्लैद्याद यूहन्नाए येसु ख्रीस परमेस्वरनी मिं मिन्सिद हुव साचो ओज़ा ज़ लिद सर्द नैव (१ यूहन्ना १:१-३; ४:२-३)। फरी गे परमेस्वरए उमीर जैसिन्या ताकिन, युं सुहुपद ओय़ेनर दाद ओललाई मया दाव ताके (२:३-६; ५:१-५)। ओल परमेस्वर ज़गै ज़गैव ओतावए गे उमीर मनी चुम चुमोल मालिद सतस ज़ ल्यो ताके (१:५-७; २:७-११)। परमेस्वर फरी उर्युं गरॉव, ओमया ल्यो ओतावए गे गेल ब हिताव ज़ ताव परिके (३:११-२४; ४:७-२१)। है जैद परमेस्वरलाई मया दाज़्याव मिंए अजम्बरी जुनी दैन्या आस ब दोज़्याव (३:१-३)।

अजम्बरी जुनी यान्या पाँ

1 नो ड़ादाकिन ज़ लिज़्याव, आव गेर्नाए गे ज़ गेथैव, गेमीए ज़ गेरँःव, गेचिऊव, गेकुइए गेछापो अजम्बरी जुनीलाव पाँए जूनी ज़ है गेदाचिज़्या। 2 नो अजम्बरी जुनी ओरैःवए गे नोलाई गेरँःके सोनो गे गोहाई गेएज़्या। है जैद जेलाई नो अजम्बरी जुनीए था गेसथैचिज़्या। नो ड़ादा परमेस्वर बाबुए ल्योड ओल्यो, हो ज़ गेल्योक रँःके। 3 जेस सिप गेताया लिद गेथैव गेरँःव पाँ ज़ जेलाई गेसथैचिज़्या। हो ताकिन ची परमेस्वर बाबु सोनो ओज़ा येसु ख्रीसस मनी सिप गेताज़्या। 4 आव चिथी गेयुं होलाँ घताक लिद सर्द गेनै।

### ज़गैवलाव येमदा बान्या

5 ओल ओल्योनी जो थैद गेनै, हो ज़ जेलाई गेसथैचिज़्या। हो पाँ आव ज़ – परमेस्वर ज़गैव लिज़्या, नोस चुम चुमो जात्त ज़ माले। 6 गे ओलस सिप गेलिज़्या है गेलिज़्यावत ब चुम चुमोलाव येमदा गेबाकिन ते साचो पाँ मादाद धुत गोपाँव ज़ थोरिके। 7 खाली ओल ज़गैवल उलिज़्याव मिताव गे ब ज़गैवल गेबाकिन परमेस्वरए उमिनताव भरिरास खैद तोबो नै में ब गेताज़्या। परमेस्वरए ओज़ा येसु ख्रीसए गेदोव पापए जूनी उझी सोभोद उजिउ झाःद ओयासिउए छैवर गेताज़्या। 8 गे सुवाराए ‘डास काता पाप ज़ माले’ है गेलिकिन ते गेक्याँलाई गे ज़ धोका याद साचो पाँ गेस माताए। 9 फरी, ‘डा पापी ज़ डालिज़्या’ लिद गेमामोंसिकिन ते परमेस्वरए गेदोव पापर प्राइँ रासद्याद मादान्या गेदोव येनरानी छैवर जैसिज़्याव। नो येनत परमेस्वरए अधर्म मादोव, युँ हुबो ज़ लिज़्या। 10 फरी, ‘डा पाप ज़ डामादोए’ है गेलिकिन परमेस्वरए ओपाँ गेस माताद ओपाँ पल्टैद गेयो मिताव ज़ ताके।

## 2

1अ परमेस्वरए उमिनताव डाबाबुज़ार, जे पाप मादान्याए जूनी आव पाँर सर्द डायचिज़्या। खाली सुवाराए कैताराक पाप जेदोकिन परमेस्वर गेबाबुस पाँद्याज़्याव गेत्याला तोबो लिज़्या – नो ओखत माल्यो छैव येसु ख्रीस ज़। 2 नोए गेपापए सजा ओल ज़ फोःद्याद परमेस्वरस सखैसिज़्याव। नो गेलाई वाज़ माःक, मानुवाताव मिँ भरिरालाई मनी ज़।

### परमेस्वरए ओपाँ दाज़्याव मिँ

3 परमेस्वरए ओपाँ गेदोकिन वाज़ ‘परमेस्वरलाई डासरेस्के’ लिन्या गेसैज़्या। 4 ओयाःए वाज़ ‘परमेस्वरलाई डासरेसुज़्या’ है लिज़्याव मिँ परमेस्वरए ओपाँ ओमादोकिन नोस साचो पाँ माले, धुत वाज़ लिज़्या। 5 खाली परमेस्वरए ओपाँ दाज़्याव मिँ ते

परमेस्वरए ल्योदाडाव ओमया ओसयोःधुव मिताव ज़ लिज़्या। है जैद परमेस्वरस गेखैव गोमाखैव ननी ज़ रैंःज़्या। 6 है जैद जोए ‘डा परमेस्वरस खैव डालिज़्या’ है उलिकिन नो मिँए ख्रीसए ओदोज़्याव मिताव ब दाव परिके।

पलाँवल लिज़्याव मिँ

7 डायुँलाव डानै डामेर, आव सर्द डयाचिज़्याव, जेमाथैताव साःरो पाँ माःक। ड़ादाकिनकाव जेस लिज़्याव एकतार जेथैज़्याव पाँ ज़। 8 हैदी ब डा ड़ासज़्याव पाँ ते साःरो लिज़्या। आव ख्रीसए ओक्याँत रैंःद ले, जेक्याँत मनी रैंःज़्या, काराव ल्यो ताकिन नो पाँए ज़ चुम चुमोलाई समैद पलाँ जैहुक्यो। 9 है जैद जोए ‘डा नो पलाँवल डालिज़्या’ है लिद परमेस्वरए उमिनताव ओनैलाई ओसोकिन, नो मिँ आःपै चुम चुमोल ज़ लिज़्या। 10 जोए परमेस्वरए उमिनताव मिँलाई मया दोज़्याव, हो पलाँवल ओतावए नोलाई कान्त ज़ पर्दपून्या ओछ्यास माले। 11 नैलाई सोज़्याव मिँ चुम चुमोल परिद ‘आदा ड़ाबाज़्या’ लिन्या ब मासैव। नोलाई माचाव ओय़ेनए मुन्दुक्यासो जैद नैव।

मानुवाताव पाँरादा युँ माझाःन्या

12 जे बाबुज़ारालाई सर्द ड़ायाचिज़्या।

ख्रीसए उमिनए जूनी परमेस्वरए जेपाप क्याल्द्याचिक्यो।

13 जे बाबुरालाई सर्द ड़ायाचिज़्या।

जे भाःकिन ज़ लिज़्यावलाई जेसरेसूज़्या।

जे धापाज़ाकावरालाई सर्द ड़ायाचिज़्या।

जे सैतानलाई हारैद जेनै।

जे ज़िमज़ा लुज़ारालाई सर्द ड़ायाचिज़्या।

जे स्वर्गताव जेबाबुलाई जेसरेसूज़्या।

14 जे बाबुरालाई सर्द ड़ायाचिज़्या।

जे भाःकिन ज़ लिज़्यावलाई जेसरेसूज़्या।

जे धापाजाकावरलाई सर्द डाय्याचिज्या।

परमेस्वरए ओपाँ जेयुँल बास ओदोवए

जे थोरिद सैतानलाई हारैद जेने।

15 जे आव मानुवाताव पाँरादा जेयुँ ताझाःच्यो। नितावदा उयुँ झाःज्याव मिँए ओमया परमेस्वरए ल्योदा माले। 16 आव मानुवाताव पाँर आवर ज़ – जोत ब युँ मानैधुन्या, पाइँत ज़ मी तून्या, नै मेकिन कातानी डाघ्योःके लिद युँ थू जैन्या। आव सोम्लो पाँ परमेस्वरनी हुव माःक, मानुवाताव पाँ ची। 17 आव मानुवा ते तछा ओपाँरास ज़ खेमरिज्या। परमेस्वरए उयुँलाव मिताव येन दोज्याव मिँ ते खर्क ज़ खेमन्या माले।

### ख्रीसकिन तँदाडाव

18 जे परमेस्वरए उमिनताव डाबाबुजार, खेमन्या बेला योनाद ले। हो बेला ओमाहुद ज़ ख्रीसकिन तँदाडाव हुरिज्या लिन्या ब जेसैज्याखेहो। आज्याल ब नितावर कुधु ज़ ताधुकेर। है जैद आव बेला ओखेमनाव ननी ब रैःज्या। 19 नो ख्रीसकिन तँदा जैसिज्यावर गेनी हाइसिद बावर ज़। खाली नोर गेस साचो लिज्यावर माःक ओल्यो। गेस साचो ल्योर ताकिन हाइसिद माबाखेरहो। है जैद याबावए नोर गेसकावर माःक ओल्यो लिन्या रैःके।

20 जे ते नितावर माःक। जे ते ख्रीसनी छैँव पुरूस दैद साचो पाँ जेसैज्या। 21 आव पाँ जेमासैँए लिद डासर्ज्याव ते माःक, जेसैँज्या लिद ज़ डासरो ची। साचो पाँनी धुत मापुलुसे लिन्या ब तामेःच्यो। 22 'येसु परमेस्वरए खतैद उपरींव ख्रीस माःक' है लिद धुत पाँज्याव सु? नो 'येसु सोनो परमेस्वरनी ज़ा बाबुनी माःक' है लिज्याव ख्रीसकिन तँदाडाव मिँ ज़ सानी। 23 जोए 'येसु परमेस्वरए ओजा माःक' है लिज्या, नोस ओबाबु परमेस्वर ब माले। जोए 'येसु परमेस्वरए ओजा ज़' है लिज्या, नोस ओबाबु परमेस्वर ब लिज्या। 24 जे ते डादाकिन ज़ जेथैव पाँलाई जेयुँल नैच्यो। नो पाँर जेयुँल

जेनैकिन परमेस्वरए ओज़ा सोनो गेबाबु परमेस्वरसकावर तान्या जेले। 25 नो ओज़ा खीसए ओल ज़ 'अजम्बरी जुनी डायचिरिज़्या' लिद याका याद नैसिउ।

26 जेलाई बलेव पैज़्यावराए ल्योनी कसाराक झुकिर्या लिद आव पाँर सर्द नैद डायचिए। 27 निताव उलिदी ब नो जेदैव परमेस्वरए उपरूसए जेयुँल बास ओदोवए सुए ज़ जेलाई पैव मापरिए। होए साचो पाँ भरी ओल ज़ पैचिज़्याव, धुत पाँ मापैचिउ। है जैद होए ओपैचिउ मिताव ज़ जे खीसए ओपाँत लिच्यो।

### परमेस्वरए ओज़ार तान्या

28 है जैद बाबुज़ार, जे खीसए ओक्याँत ज़ धिद ल्यो ताके। हो ताकिन ची फरी उहुव बेलाक होए ओड़ाक लाज मोर्नो तान्या गेमाले। 29 खीस छैव लिज़्या लिन्या जे ज़ जेसैज़्या। है जैद परमेस्वरए ओड़ाक चाव येन दोज़्यावर परमेस्वरनी जर्मिउ ओज़ार ताज़्यार लिन्या ब सैव ताके।

## 3

1 गेबाबु परमेस्वरए गेलाई बनै मया दाद ओज़ार जैसिक्यो। हैज गे ओज़ार ज़! खाली आव मानुवाताव मिँराए ओज़ालाई यामासरेसज़्यावए गेलाई ब मासरेस्सिर। 2 डायुँलाव डानै डामेर, आखकिन ज़ परमेस्वरए ओज़ार ताद गेले। खाली अजम्बरी जुनील इताव गेतारिज़्या लिन्या ते गेमासैए। आव वाज़ गेसैज़्या, खीस फरी उहुक ओल किताव उलिज़्याव गे ब हिताव ज़ तान्या गेले। हो छचाम वाज़ खीसलाई चबनै रँ:न्या गेले। 3 है जैद जोए आव पाँत आस दोज़्याव, नो मिँए खीस किताव छैव उलिज़्याव, हिताव ज़ ओल ब उयुँलाई छैव जैज़्याव।

4 कानुन माभै:न्या ज़ पाप। है जैद पाप दोज़्याव भरिए ते परमेस्वरए ओकानुन माभै:र। 5 खीसस ते पाप काता ज़ माले। ओल ज़ नो गेदोव पाप समैद्यान्याए जूनी मिँ मिन्सिद हुके। 6 है जैद खीसस

लिज्यावराए पाप दावका दाव मालेर। पाप दाव ज़ नैज्यावराए ते ओललाई ब मारैःधुर, सरेस्र्या ब मासरेस्र्धुर।

7अ डाबाबुज़ार, जे नो बलेःज्यावराए यापाँत ताङ्गुकिच्यो। जो मिँए साचो येन दोज्याव, नो ख्रीस मिताव छैव लिज्या। 8 फरी जो मिँए असत दोज्याव हो सैतानसकाव ज़ लिज्या। सैतानए ओयेन भरी भाःकिन ज़ असतलाव वाज़ लिज्या। है जैद नोए ओयेन समैद्यान्याए जूनी परमेस्वरए ओज़ा मिँ मिन्सिद हुके। 9 परमेस्वरए ओराजमैवराए याक्याँत ओल ओगेर यारैःवए पाप दावका दाव ज़ मालेर। नोर परमेस्वरनिकाव यातावए असत दो ज़ मादोधुर। 10 है जैद परमेस्वरए ओथोर सोनो सैतानए ओथोर आनी ज़ छुतिज्यार — जोए असतलाव येन दोज्याव हो परमेस्वरसकाव माःक। नै मेंलाई मया मादाज्याव ब हो मिताव ज़।

तोबोए तोबोलाई मया दासिन्या

11डादाकिन ज़ जेथैज्याव परमेस्वरए ओपाँ आव ज़ — तोबोए तोबोलाई मया दासिन्या। 12 सैताननिकाव कयिनए ओभाइ हाबिललाई ओसैःव मिताव ते दान्या माःक। नो कयिनए ओल ओयेन माचाव, ओभाइए ओयेन चाव ओतावए ओभाइलाई सैःक्यो। 13 डानै डामेर, आव मानुवाताव मिँराए जेलाई यासोचिक हार तामानिच्यो।

14गे नै मेंलाई मया गेदोज्यावए सिन्यानी पुलुसुद अजम्बरी जुनी दैन्याल हुद गेले लिन्या गेसैज्या। नै मेंए ल्योदा ओमया मालयो मिँ ते सिन्या सजाल ज़ लिज्या। 15 नै मेंलाई सोज्याव मिँए उयुँल ओसैःधुव मिताव ज़ लिज्या। जे ब जेसैज्या, मिँ सैःज्यावए ओक्याँत अजम्बरी जुनी माले।

16ख्रीसए गेलाई मया ओदासिउ आनी ज़ रैःज्या, गेजूनी उजिउ ज़ झाःद्यासिक्यो। है जैद गे ब नै मेंए जूनी जिउ झाःन्या ब तयार ताव

परिके। 17 योःव मिँए माथैव मायोःवलाई उयुँ मानाद ओमाचिऊकिन परमेस्वरलाई ब मया मादोव। 18 जे डाबाबुज़ार, नै मेंलाई मया दान्या याःए वाज़ माःक, साचो येननी ब दाव ताके। 19 गे साचो पाँल गेलिज़्याव सैँ गेमालिज़्याव लिन्या ब ननी ज़ रैँःज़्या। साचो पाँल गेलिकिन परमेस्वरए ओड़ाक धुक्क तान्या गेले। 20 खाली गेयुँए ज़ गेलाई गेखत ल्यो ओथरैसिकिन परमेस्वर ते गेयुँकिन झन घ्योःव लिज़्या। ओल ज़ प्राइँ युँलाव पाँ सैँज़्याव।

21 डायुँलाव डानैँ डामेर, गेयुँए गेलाई गेखत ल्यो ओमाथरैसिकिन परमेस्वरए ओड़ाक च्याँःसिन्या गेयुँ झैँःज़्या। 22 फरी गे परमेस्वरए है ओल्यो भरी दाद उयुँलाव मिताव येनर गेदोकिन ओलस गेनिज़्याव भरी ब सयोःद्यान्या ले। 23 प्राइँरानी गे दाव परिन्या येन आव ज़ — ओल है ओदासिउ मिताव ज़ ओज़ा येसु ख्रीसए उमिनत गेयुँ हुपद गे गेल मया दासिन्या। 24 इतावनी परमेस्वरए ओपाँ भैँःज़्याव मिँ परमेस्वरस लिज़्या, परमेस्वर ब ओलस लिज़्या। है जैद गेयुँल बास दाद नैज़्याव परमेस्वरए उपुरूसनी ज़ परमेस्वर गेस ज़ उलिज़्याव गेसैँज़्या।

#### 4

##### परमेस्वरसकावर सोनो परमेस्वरकिन तँदाडावर

1 डायुँलाव डानैँ डामेर, 'परमेस्वरए उपुरूसनी डापाँज़्या' है लिज़्यावरालाई प्राइँलाई तारापतिच्यो। डादा 'परमेस्वरनी हुव पुरूस सैँ माःक' लिद थरैद वाज़ यारापतिच्यो। परमेस्वरए उमिन कुद तँनी पैज़्यावर कुधु ज़ ताद लेर। 2 जे ते परमेस्वरए उपुरूसनी पाँज़्यावलाई आनी ज़ सरेसून्या जेले — जोए 'येसु ख्रीस परमेस्वरनी मिँ मिन्सिद हुव ज़' है लिज़्या, नो परमेस्वरए उपुरूसनी ज़ पाँज़्या। 3 जोए 'येसु परमेस्वरए ओज़ा ख्रीस माःक' है लिज़्या, नो मिँ परमेस्वरए उपुरूसनी पाँज़्याव माःक। नो ते

ख्रीसकिन तँदाडाव पुरूस ची। नो हरिज्यावए उजूनी डादाकिन ज़ जेथैज्याव, होए ओपाँ आज्याल ब रैं:धुके। 4 खाली जे ते, डाबाबुज़ार, परमेस्वरनिकावर ताद निताव पाँज्यावरालाई हारैद जेरानै, काराव ल्यो ताकिन जेस लिज्याव परमेस्वर मानुवात लिज्यावकिन घेप्पा लिज्या। 5 नोर आव मानुवातावर यातावए मानुवाताव पाँ ज़ पाँज्यार। मानुवाताव मिंराए नोराए यापाँ भैं:ज्यार। 6 गे ते परमेस्वरसकावर गेलिज्या। परमेस्वरलाई सरेसूज्याव भरी गेपाँत हुज्यार। फरी जोर परमेस्वरए उमीर मा:क, होराए आव गेपाँ माथैर। ननी ब परमेस्वरए उपुरूसनी साचो पाँज्याव सोनो धुतनी पाँज्यावनी छुतिज्यानी।

### छुतलाई मया दान्या

7अ डायुँलाव डानै डामेर, जे जेल मया दासिच्यो। निताव येन दान्या परमेस्वरए ल्योनी ज़ हुज्या। है जैद नै नैल मया दासिज्यावर परमेस्वरनी जर्मिउर, परमेस्वरलाई सरेसूज्यावर ताज्यार। 8 परमेस्वर ओमया ल्यो लिज्या। है जैद ओमया माल्योए परमेस्वरलाई मासरेसो। 9 परमेस्वरए गेलाई मया ओदासिज्याव आनी ज़ रैं:ज्या — गेलाई बाँचैन्याए जूनी तोबोका तोबो ओज़ा आव मानुवात परींघासिक्च्यो। 10 छुतलाई मया दान्याए ओअर्थ आनी ज़ रैं:ज्या — गे परमेस्वरलाई मया गेदोव मा:क, ओल परमेस्वरए ज़ गेलाई मया दाद गेपापए सजा फो:घान्याए जूनी ओज़ालाई परींघासिक्च्यो। 11 डायुँलाव डानै डामेर, परमेस्वरए गेलाई निताव मया ओदासिउए गे मनी गे गेल मया दासिउ ताके। 12 परमेस्वरलाई सुए ज़ खर्क ज़ मारें:तार। हैदी ब गे गेल मया गेदासिकिन, परमेस्वर गेस उलिज्याव रैं:ज्या, सोनो ओमया गेक्याँत यो:ज्या।

13 परमेस्वरए गेलाई उपुरूस याद ओनैसिज्यावए गे ओलस गेलिज्या, ओल गेस उलिज्याव गेसैज्या। 14 सोनो गे ओलस ल्यो



उसिसर ब 'परमेस्वरए आव मानुवातावरालाई बाँचैन्याए जूनी ओजा परींद ओयासिउ साचो ज़' लिन्या ओसाचीर गे ज़ गेलिज्या। 15 जोए 'येसु परमेस्वरए ओजा ज़' है लिज्या, नोस परमेस्वर लिज्या, ओल मनी परमेस्वरस ज़ लिज्या। 16 परमेस्वरए गेलाई मया ओदासिज्याव गेसैज्या, सोनो नत ज़ गेयुँ हुपूज्या। परमेस्वर ओमया ल्यो लिज्या। गे ब ओल माँ:ती छुतलाई मया गेदोकिन गे परमेस्वरस गेताज्या, परमेस्वर ब गेस ताज्या। 17 तोबोए तोबोलाई मया दान्यात परमेस्वरए ओमया चबनैरै:ज्या। है जैद गे आज्याल ब ओल स्यासो गेलिज्यावए परमेस्वरए ओराफाल्रिज्याव छचाम ओड़ाक माछे:द ज़ गेयुँ होलाँ जैद बान्या गेले। 18 परमेस्वरए ल्योक रेंद बाज्याव मिँ माछे:ए। नो ओमया ल्यो ओतावए ओछ्याचे भरी माज्या। 'सजा डादैया' है लिज्याव वाज़ छे:ज्या। छे:ज्याव मिँए परमेस्वरए ओमया मासैव। 19 परमेस्वरए डादा गेलाई मया ओदासिउए गे ब तोबोए तोबोलाई मया गेदोज्या। 20 जोए ओया:ए वाज़ 'परमेस्वरलाई मया डादोज्या' है लिद परमेस्वरए उमिनताव ओनैलाई ओसोकिन, नोए ओपाँ धुत ज़ रै:ज्या। ओल ज़ उरँ:व नो ओनैलाई मया ओमादोकिन, ओमारै:ज्याव परमेस्वरलाई झन कै जैद मया ओदोधुरिज्याव? 21 परमेस्वरए ल्योनी गेदैव दान्या पाँ आव ज़ — जोए परमेस्वरलाई मया दोज्याव, होए नै मेंलाई ब मया ओदोवक।

## 5

## परमेस्वरए ओसाची पतिन्या

1 जोए 'येसु परमेस्वरए खतैद उपरींव ख्रीस ज़' है लिद पतिज्याव, नो परमेस्वरनी जर्मिउ लिज्या। सोनो जोए गेलाई जर्मैज्याव गेबाबुलाई मया दोज्याव, होए परमेस्वरए ओराजमैव ओज़ारालाई ब मया यादोज्याव। 2 गे परमेस्वरलाई मया दाद ओपाँ गेदोकिन

ननी ज़ परमेस्वरए ओराजमेंव ओज़ारालाई मया गेरादोज्याव गेसैज्या। 3 परमेस्वरए ओपाँ गेदोकिन वाज़ परमेस्वरलाई मया गेदोज्याव थंरिज्या। ओल ओज़ारालाई ओपाँ दान्या खाव माले, इयासो लिज्या। 4 काराव ल्यो ताकिन परमेस्वरए ओज़ार ओलनी जर्मिउर यातावए आव मानुवाताव यालाई बलेव पैज्याव पाँरालाई याराहारैज्यार। नो गेराहारैज्याव ओललाई गेयुँ हुपूद गेलिज्यावनी ज़। 5 'येसु परमेस्वरए ओज़ा ज़' लिद पतिज्यावराए वाज़ मानुवाताव यालाई बलेव पैज्यावरालाई याराहारैधुज्यार।

6नो परमेस्वरए ओज़ा येसु ख्रीस मिँ मिन्सिद उहुव, रील ओसछेंसिउ छचाम ब रें:के, उझी सोभोद उजिउ ओझा:व छचाम ब रें:के। 7 आज्याल गेयुँल बास दाद नैज्याव परमेस्वरए उपुरूसए ब होए ओसाची ज़ यासिज्याव। नो पुरूसए साचो थंरिउ पाँ वाज़ दोज्याव। 8 येसु परमेस्वरए ओज़ा ज़ लिद साची याज्यावर सोम्लो लिज्यार। तोबो परमेस्वरए उपुरूस, तोबो रील ओसछेंसिउनी, तोबो उझी सोभोद उजिउ ओझा:वनी ज़। है जैद नो सोम्लोराए यासाची खैज्या। 9 गे मिँराए यासाची गेपतिज्या, परमेस्वरए ओसाची ते झन थंरिउ लिज्या। परमेस्वरए मिँरालाई साची ओराएज्याव ओज़ाए उजुँनी ज़ लिज्या। 10 जोए ओज़ालाई उयुँ हुपूज्या, होए परमेस्वरए ओसाची उयुँल रैद नैव। फरी जोए परमेस्वरए ओसाचीत उयुँ माहुबे, होए नो साचीलाई धुत थंरैज्याव, काराव ल्यो ताकिन परमेस्वरए ओज़ाए जूँनी ओयो साची मापतिउ। 11 गेलाई परमेस्वरए ओयासिज्याव साची आव ज़ — गे मिँर अजम्बरी जुनी दैन्यार गेताज्या, नो जुनी ओज़ाए ओक्याँत वाज़ लिज्या। 12 जोए परमेस्वरए ओज़ालाई उयुँल रैज्याव, होए ज़ अजम्बरी जुनी दैज्याव। जोए ओज़ालाई उयुँल मारैव, होस अजम्बरी जुनी माले।

13 आव डासरो चिथी जे परमेस्वरए ओज्जालाई जेयुं हुपूज्यावराए जूनी सर्द डानै। आव चिथीनी ज़ अजम्बरी जुनी जेस उलिज़्याव सैन्या जेले। 14 परमेस्वरए ओपैज्याव मितावनी गेन्निकिन 'गेन्नित भरित थैद्यान्या ले' लिद ओड़ाक माछेद ज़ बान्या गेयुं हुपून्या ले। 15 नो गेन्नित भरित ओथैकिन नो भरी गेदैधुके लिन्या गेसैज्या।

नैलाई पापनी सोवोल्न्या

16 जेनी तोबो जेनेए पाप ओदोज्याव जेसैकिन, नोए उजूनी पोंखारिद जेएकिन, नोलाई परमेस्वरए बाँचैन्या ले। नोए ओदोज्याव पापनी माओल्द सिन्या सजादा ज़ ओबाकिन पोंखारिद जेमाएदी ब ताए।

17 असतलाव येन भरी पाप ज़ लिज्या। हैदी ब नो जेने पापनी ओल्धुन्या स्यासो उलिकिनी, नोए जूनी पोंखारिउ ज़ ताके।

18 परमेस्वरनी जर्मिउ मिँए ते पाप दावका दाव माले लिन्या गेसैज्या। परमेस्वरए ओज्जा ख्रीसए ज़ नोलाई पाथस नैद सैतानलाई बलेव मायो। 19 गे परमेस्वरनिकावर ज़ लिन्या गेसैज्या। मानुवाताव भरी ते सैतानए उधूल ज़ लिज्यार। 20 गे आव ब गेसैज्या, परमेस्वरए ओज्जाए साचो परमेस्वरलाई सरेसो परीन्याए जूनी ओल ओक्यांत ज़ सरेसो परीसिक्यो। ओज्जा येसु ख्रीसनी साचो परमेस्वरस सिप गेलिज्या। साचो परमेस्वर ब ओल ज़, अजम्बरी जुनी ब ओल ज़।

21 डाबाबुज़ार, जे मिँराए याजैव अडग्यालाई 'आव ज़ ईस्वर' है लिज्यावराए ल्योनी जोगोइसिद लिच्यो।

**साःरो बाचा**

Kham, Western Parbate: साःरो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

---

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd